

आकाशवाणी

खबरां

1. विदेश मंत्री डॉ. एस जयशंकर होरें आखेआ जे पोलैंड गी लोडचदा ऐ जे ओहू आतंकवाद गी दना बी बर्दाश्त नेई करै ते कन्नै भारत दे गोआंडी देसै च आतंकवादी ढांचे गी बढावा बी नेई देऐ।
2. भारत-यू.ए.ई व्यापक रणनीतिक सांझेदारी गी अगगे बधाने लेई त्यार, यूएई दे राष्ट्रपति शेख मोहम्मद बिन जायद अल नेहयान होर अज्ज अपने अधिकारिक दौरे पर नमीं दिल्ली पुज्जे।
3. राई-बाई सरबंधी मंत्री शिवराज सिंह चौहान होरें विकसित भारत जी राम जी एकट बारै गलत जानकारी फैलाने दा इलजाम लाया।
4. भाजपा दे राष्ट्री अध्यक्ष चुनने लेई नामांकन दायर कीते गो।
5. स्विट्जरलैंड दे दावोस च शुरू होने आहले वलर्ड इकोनामिक फोरम च हिस्सा लैने लेई 100 शा मते भारती ई.सी.ओ ते सरकारी प्रतिनिधिमंडल पुज्जे।
6. सुन्ने ते चांदी दी कीमतें च रिकार्ड उछाल, चांदी 3 लक्ख रपे प्रति किलो ते सुन्ने दी कीमत 1.44 प्रति 10 ग्राम पुज्जी गई।

<><><><><><>

EAM-Poland

विदेश मंत्री डॉ. एस जयशंकर होरें आखेआ जे पोलैंड गी लोडचदा ऐ जे ओहू आतंकवाद गी दना बर्दाश्त नेई करै ते कन्नै भारत दे गोआंडी देशें च आतंकवादी ढांचे गी बढावा बी नेई देऐ। पोलैंड दे उप प्रधानमंत्री ते विदेश मंत्री रादोस्वाफ शिकोस्की हूंदे कन्नै अज्ज नमीं दिल्ली च बैठक दरान डॉ. जयशंकर होरें आखेआ जे पोलैंड लेई भारत दा इलाका कोई बेपंशान इलाका नेई ऐ ते ओहू बन्ने पारा आहले आतंकवाद दी लम्में चिरें थमां चलदी आवा'रदी चुनौती कन्नै बी खरी चाल्ली वाकफ ऐ। उनें आखेआ जे दौनें पखें बश्कार गल्लबात च इलाकाई ते आलमी सतह दिऐं घटनाएं पर चर्चा होग। डॉ. जयशंकर होरें आखेआ जे हाल दे समें च अमरीका ते फ्रांस च उनें यूक्रेन संघर्ष ते औहदे असर दे बारै च भारत दा नजरिया सांझा कीता हा। उनें आखेआ जे भारत गी जानी-बुज्जियै नशाना बनाना गैर मुनासिब ते बेन्यायी करने ज्नेआ ऐ। डॉ. जयशंकर होरें आखेआ जे मध्य यूरोप च पोलैंड भारत दे सभनें शा बड्डे कारोबारी भ्यालें चा इक ऐ। दौनें देशें बश्कार दक्खी बपार 7 अरब डालरें दा ऐ जेहदे च पिछले इक्क दाहके दरान तकरीबन 200 फीसद दा बाढा दर्ज कीता गोआ ऐ। उनें दस्सेआ जे पोलैंड च भारत दी रास-पूंजी त्रै अरब डालरें शा मती होई गेदी ऐ जेदे नै पोलैंड च रोजगार दे केई मौके पैदा होए ना। डॉ. जयशंकर होरें आखेआ जे भारत दा मजबूत आर्थिक विकास, ओहदे बजारें दा आकार ते रास-पूंजी केंद्रित नीतियां पोलैंड दे कारोबारिएं लेई बड्डे मौके उपलब्ध करोआंदा ऐ।

<><><><><><>

UAE-Prez. Visit

संयुक्त अरब अमीरात दे राष्ट्रपति शेख मोहम्मद बिन जायद अल नेहयान अज्ज सझा नमी दिल्ली पुज्जी गो। यू.ई दे राष्ट्रपति दे तौरा पर पदभार साम्भने दे बाद एहू उंदी त्री आधिकारिक भारत यात्रा ऐ ते पिछले इक दाहके दरान भारत दा उंदा 5मां दौरा ऐ। हवाई अड्डे पर पुज्जने पर प्रधानमंत्री नरेंद्र मोदी होरें उंदा सुआगत कीता। यू.ए.ई दे राष्ट्रपति हुंदा प्रधानमंत्री मोदी हुंदे आवास पर मिलने दा कार्यक्रम ऐ। मेद ऐ जे इस दौरे कन्नै दौनें नेताएं गी भारत यूएई दी व्यापक रणनीतिक सांझेदारी गी होर अगगे बधाने ते क्षेत्रीय ते वैश्विक मुद्दें उप्पर विचारें दा आदान-प्रदान करने दा मौका थहोग।

<><><><><><>

## US Prez. Modi Invitation

अमरीका दे राष्ट्रपति डोनाल्ड ट्रम्प होरें प्रधानमंत्री नरेन्द्र मोदी होरें गी शांति बोर्ड दा हिस्सा बनने लेई साद्दा दिता ऐ। एह बोर्ड गाजा च स्थायी शांति आनने दी दिशा च कम्म करोग। डोनाल्ड ट्रम्प होरें इस सरबन्धे च प्रधानमंत्री नरेन्द्र मोदी होरें गी इक चिट्ठी भेजी ऐ- जिसी भारत च अमरीकी राजदूत सर्जियो गोर होरें सोशल मीडिया पर सांझा कीता। अपनी चिट्ठी च ट्रम्प होरें आखेया ऐ जे मध्य पूर्व च शांति बहाल करने ते कन्नै गै वैश्विक संघर्ष दे हल आस्तै इक साहसिक नमें नजरिए गी अपनाने दे जतन च मोदी होरें गी अपने कन्नै शामिल होने आस्तै साद्दा देना उन्दे लेई बडे मते सम्मान दी गल्ल ऐ। ट्रम्प होरें गाजा पट्टी च इजरायल ते हमास बश्कार युद्ध विराम समझौते दे दुए गेड दे तैहत इस बोर्ड दा अनावरण कीता।

<><><><><><>

## DISCOMS

केंद्री बिजली मंत्री मनोहर लाल होरें अज्ज आखेआ जे देश दी बिजली वितरण उपयोगिता च 2024-25 च 2 ज्हार 700 करोड़ रपे शा मते दा मनाफा दर्ज कीता गेआ ऐ। मंत्री होरें एह गल्ल नमीं दिल्ली च आई.आई.टी दिल्ली कैंपस च सेंटर ऑफ एक्सीलेंस फॉर पावर एंड रेगुलेशन दा उद्घाटन दरान आक्खी। उनें इस गल्ला पर जोर पांदे होई आखेआ जे सरकार अगले बजट सत्र दरान बिजली कनून च इक संशोधन पेश करग जेदे कन्नै इस क्षेत्र गी कोई नुकसान नेई होग। ।

<><><><><><>

## Shivraj

राई-बाई ते करसान कल्याण मंत्री शिवराज सिंह चौहान होरें कांग्रेस पार्टी उप्पर विकसित भारत जी राम जी अधिनियम गी लेइयै देश दी जनता गी गुमराह दा आरोप लाया हा। अज्ज नमीं दिल्ली च चौहान होरें आखेआ जे मनरेगा तैहत कांग्रेस आसेआ दित्ते गेदे अधिकार छडे कागजें तगर गै सीमित रेय हे। उनें आखेआ जे कांग्रेस नै अपने विचारें, विचारधारा ते आदर्शें गी त्यागी दित्ते दा ऐ ते देश दे विकास या गरीबें दे कल्याण कन्नै उंदा कोई लैना देना नेई ऐ। केंद्री मंत्री होरें आखेआ जे एह अधिनियम पूरे देश च लागू होग ते हर इक ग्राम पंचैत एहदे दायरे च औगा।

<><><><><><>

## BJP-Prez. Nominatoin

बीजेपी दे राष्ट्री अध्यक्ष दे चुनांऽ लेई नामांकन दायर करने दी प्रक्रिया नमीं दिल्ली च पार्टी दे मुख्यालय च शुरू होई गेई ऐ। चुनावी कार्यक्रम दे मताबक अज्ज संझा 4 बजे तगर नामांकन दायर कीते गे। अमित शाह, राजनाथ सिंह, जे.पी नड्डा, नितिन गडकरी, जी किशन रेड्डी, मनोहर लाल खट्टर सने केई केंद्री मंत्री पार्टी दे मुख्यालय पुज्जे। हरियाणा दे मुख्मंत्री नायब सैनी, मध्य प्रदेश दे मुख्मंत्री मोहन यादव, गोवा दे मुख्मंत्री प्रमोद सावंत ते राजस्थान दे मुख्मंत्री भजन लाल शर्मा होर बी पार्टी मुख्यालय पुज्जे। नामांकन वापस लैने दा समां अज्ज संझा 6 बजे तगर हा।

<><><><><><>

## EC Democracy Conf.

चुनांऽ आयोग औंदे बुधवार थमां नमी दिल्ली दे भारत मंडपम च भारत अंतरराष्ट्री लोकतंत्र ते चुनांऽ प्रबंधन सरबन्धी सम्मेलन दी मेजबानी करग। 3 दिनें दा एह सम्मेलन लोकतंत्र ते चुनावी प्रबंधन दे खेत्तर च भारत आसेआ आयोजित अपनी किस्मै दा हुनै तगर दा सभनें शा बड्डा वैश्विक सम्मेलन होग। एहदे च दुनिया भरै दे 70 शा मते मुख्बें दी अगुवाई करने आहले तकरीबन 100 अंतरराष्ट्री डैलीगेटें दे हिस्सा लैने दी मेद ऐ। इस सम्मेलन च अंतरराष्ट्री संगठनें दे नुमाइंदे, भारत च स्थित विदेशी मिशन ते चुनांऽ खेत्तर कन्नै जुडे दे शिक्षाविद ते कम्म करा'रदे माहिर विशेषज्ञ बी शामिल होडन। चुनांऽ आयोग बक्ख-बक्ख देशें च चुनांऽ प्रबंधन कन्नै जुडी दिएं चुनौतिएं पर चर्चा ते सहयोग गी अगगे बदाने आस्तै चुनांऽ प्रबंधन निकाएं दे कन्नै 40 शा मती दपक्खी बैठकें दा बी आयोजन करग।

<><><><><><>

## LG-Powers

देसै दे 5 केंद्र शासित प्रदेशों दे लेफ्टिनेंट गवर्नरें या प्रशासकें गी हुन एह इख्तियार दित्ते गए न जे ओह सरबंधत अधिकारिं गी अधिकृत करी सकदे न जे ओह केंसर ते शूगर ज्नेई किश खास बमारिं दे इलाज लेई जादुई उपाऽ ते ईलाज दा दावा बन्नने आहले ते लोकें गी गुमराह करने आहले इश्तियारें कन्नै सरबंधत ईमारतें दी तलाशी जां उत्थे रक्खेआ गोदा कोई बी रिकार्ड जब्त करी सकदे ना। गृह मंत्रालय पासेआ हाल च गै सरकारी गैजेट च अधिसूचित इक्क हुकमै च सरकारै जम्मू-कश्मीर, लक्ष्यद्वीप, चंडीगढ़, दादरा ते नगर-हवेली, दमन ते दीव ते पुदुचेरी केंद्र शासित प्रदेशों दे लेफ्टिनेंट गवर्नरें या प्रशासकें गी एह इख्तियार दित्ते ना।

<><><><><><>

## World CEO

स्विटजरलैंड दे दावोस च 19 शा 23 जनवरी तगर होने आहले विश्व आर्थिक मंच दी 56मीं बैठक च संयुक्त अरब अमीरात दे 100 शा मते मंत्री ते वरिष्ठ अधिकारी हिस्सा लेंगन। प्रतिनिधिमंडल दा नेतृत्व दुबई संस्कृति ते कला प्राधिकरण दी अध्यक्ष शेख लतीफा बिन मोहम्मद बिन राशिद अल मकतूम होर करंगन। दावोस च संयुक्त अरब अमीरात दे एजेडे च मनुक्खी ते विकास सरबंधी मुद्दे प्रमुख रौहगन।

<><><><><><>

## Gold-Silver Prices

अमरीकी राष्ट्रपति होरें ग्रीनलैंड कन्नै जुड़े दे विवाद गी लेइयै कई यूरोपीय मुल्लें उप्पर नमें टैरिफ लाने दी धमकी देने मगरा निवेशकें दी सेफ हैवन एसेट्स दे चलदे अज्ज सुन्ने ते चांदी दी कीमतें च रिकार्ड तेजी आई ऐ। मल्टी कम्मोडिटी एक्सचेंज च सुन्ना 1.68 फीसदी बधियै 1 लक्ख 44 ज्हार 905 रपे प्रति ग्राम होई गेआ जिसलै के एमसीएक्स चांदी च 4.39 फीसद दी बढोत्तरी होई ते चांदी 3 लक्ख 400 रपे प्रति किलो होई गेई।

<><><><><><>

## Spain Deaths

स्पेन च कल संझा दक्खी हिस्से च 2 तेज रफतार रेल गड्डिं दी टक्कर दे बाद अजें तगर 39 लोकें दे मारे जाने दी पुष्टि होई ऐ ते मते सारे लोकें दे जख्मी होने दी खबर ऐ। रेल नेटवर्क आपरेटर दे मताबक एह घटना अदामुज कस्बे दे कोल होई जिसले इक तेज रफतार रेल गड्डी पटरी उप्परां उतरी गेई ते कन्नै आहली पटरी उप्पर डिगगी गेई ते दुई बक्खिया आवा करदी इक रेल गड्डी बी पटरी थमां उतरी गेई। आपात सेवाएं दा आखना ऐ जे घट्टोघट्ट 73 लोक गंभीर तौर पर जख्मी होई गए ना।

<><><><><><>

## Iran Death Toll

ईरान च इस म्हीने चला'रदे बरोध प्रदर्शनिं च 500 सुरक्षाकर्मी मारे गए ना। इक सरकारी सूत्र आसेआ दस्सेआ गेआ ऐ जे ईरान गी हिलाने आहले इनें बरोध-प्रदर्शनिं च मारे गेदे लोकें दी गिनतरी दा आकड़ा अजें तगर सारें शा मता ऐ। ईरानी अधिकारी नै मारे गेदे लोकें दा जिम्मेदार इजराइल ते विदेशी सशस्त्र समूहें गी ठहराया ऐ।

<><><><><><>

## Search Operation (Dispatch)

किश्तवाड़ जिले दे उच्चे पहाड़ी जंगली इलाके च छप्पे दे आतंकवादिं दे इक समूह दा पता लाने ते उं'दा सफाया करने लेई अज्ज बड्डुलै सुरक्षाबलें दा घेराबंदी ते तपाशी अभियान फही शुरू कीता गेआ ते एह्दे च फौजी हेलीकॉप्टरें दी मदाद बी लैती गेई। आकाशवाणी दे जम्मू संवाददाता दी रिपोर्ट मूजब जिले दे छात्रू इलाके च सोनार ग्रांऽ च सुरक्षाबलें दे इस अभियान गी न्हेरा ते दुगर्म पहाड़ी इलाका होने दे चलदे कल चिरें रातीं रोकी दित्ता गेआ हा। कल इस अभियान दरान छिड़े दे टाकरे च सुरक्षाबलें दे 8 जवान आतंकवादिं आसेआ कीते गेदे ग्रनेड हमले च जख्मी होई गए हे। जख्मी होए दे इनें जवानें दा अस्पताल च इलाज चला करदा ऐ। अज्ज बड्डुलै लौऽ हुं'दे गै फौज, पुलस ते नीम फौजी बलें दिएं सांझी टीमें इस अभियान गी फही शुरू करदे होई घेराबंदी होर सख्त करी दित्ती तां जे आतंकवादी कुसै मौके दा फायदा ठोआइयै नस्सी नेई सकन। इस घने जंगली इलाके च छप्पे दे आतंकवादिं दा पता लाने लेई ड्रोन ते खोजी कुत्तें दे इस्तेमाल दे कन्नोकन्नी फौजी हेलीकॉप्टरें दा बी इस्तेमाल कीता जा'रदा ऐ। तोआई, फौज दे इक जवान नै अज्ज इलाज दरान दम त्रोड़ी दित्ता ऐ। फौज दी व्हाईट नाइट कोर नै स्पेशल फोर्सेस दे हवलदार गजेंद्र सिंह होरें गी अज्ज श्रद्धांजलि अर्पित कीती ऐ जिनें सिंगपुरा इलाके च आतंकवाद रोधी अभियान दे दरान सर्वोच्च बलिदान देई दित्ता ऐ।